

四庫全書

子部

欽定四庫全書

子部
神仙傳卷十

詳校官監察御史臣邱庭澍

檢討臣何思鈞覆勘

覆校官主事臣龔敬身

校對官主簿臣汪日贊

謄錄監生臣張鴻仁

欽定四庫全書

神仙傳卷六

晉 葛洪 撰

淮南王

淮南王安好神仙之道海內方士從其游者多矣一旦有八公詣之容狀衰老枯槁偃僂闇者謂之曰王之所好神仙度世長生久視之道必須有異於人王乃禮接今公衰老如此非王所宜見也拒之數四公求見不已闇者對如初八公曰王以我衰老不欲相見却致年少

又何難哉於是振衣整容立成童幼之狀閭者驚而引進王倒屣而迎之設禮稱弟子曰高仙遠降何以教寡人問其姓氏答曰我等之名所謂文五常武七德枝百英壽千齡葉萬椿鳴九臯修三田岑一峯也各能吹噓風雨震動雷電傾天駭地迴日駐流役使鬼神鞭撻魘魘出入水火移易山川變化之事無所不能也時王之小臣伍被曾有過恐王誅之心不自安詣闕告變證安必反武帝疑之詔大宗正持節淮南以案其事宗正未

至八公謂王曰伍被人臣而誣其主天必誅之王可去
矣此亦天遣王耳君無此事日復一日人間豈可捨哉
乃取鼎煮藥使王服之骨肉近三百餘人同日昇天雞
犬舐藥器者亦同飛去八公與王駐馬於山石上但留
人馬蹤跡不知所在宗正以此事奏帝帝大懊恨命誅
伍被自此廣招方士亦求度世之藥竟不得其後王母
降時授仙經密賜靈方得尸解之道由是茂陵玉箱金
杖丹出人間抱犢道經見於山洞亦視示武帝不死之

跡耳

李少君

李少君字雲翼齊國臨淄人也少好道入泰山採藥修
絕穀遁世全身之術道未成而疾困於山林中遇安期
先生經過見少君少君叩頭求乞活安期愍其有至心
而被病當死乃以神樓散一匕與服之即起少君於是
求隨安期奉給奴役使任師事之安期將少君東至赤
城南至羅浮北至大垣西游玉門周流五嶽觀看江山

如此數十年安期一旦語之我被玄洲召即日當去汝
未應隨我至彼今當相捨去也復六百年當迎汝於此
因授神丹鑪火飛雪之方誓約口訣畢須臾有乘龍虎
導引數百人迎安期安期乘羽車而昇天也少君於是
還齋戒賣於市商估六國或時為吏或作師醫治病或
時煦賃易姓改名遊行處所莫知其有道逮漢武帝之
時聞帝招募方士特敬道術而先貧不辦合大藥喟然
長歎語弟子曰老將至矣死將近矣而財不足用躬耕

力作商估求錢必不致辦合藥又吾亦羸拙於斯事也
聞天子好道請欲見之求為合丹可得恣意無求不得
天子中成者成之不中教者便捨去吾在世上已五百
餘年而不為一權者必不免於蟲蟻之糧矣乃以方上
武帝言臣能凝汞成白銀飛丹砂成黃金金成服之白
日昇天神仙無窮身生朱陽之羽體備圓光之翼竦則
凌天伏入無間控飛龍而八遐已遍駕白鴻而九陟立
周冥海之棗大如瓜鍾山之李大如瓶臣已食之逮先

師安期先生授臣口訣是以保黃物之可成也於是引見甚尊敬之賜遺無數為立屋地武帝自謂必能使我度世者少君嘗從武安侯飲酒坐中有老人年九十餘少君言與其祖父遊射處老人為小兒時從其祖父識有此人一座盡驚少君見武帝有故銅器少君望而識之曰昔齊桓公嘗陳此器於栢寢帝按其刻果齊桓公器乃知少君數百歲人也然視之常時年五十許人面色甚好肌膚悅澤尤有光華眉目口齒似十五童子諸

侯王貴人聞能令其人不死老更少壯饋遺之金錢無限乃密作神丹丹成未服又就帝求五帝六甲左右霧飛之書凡十二事帝以元封四年七月以書授少君到元封六年九月少君稱疾上表云陛下思心玄妙志甄長生於是招訪道術無遠不至精誠感神天神斯降自非宿命所適孰能偕合然丹方禁重宜絕臭腥泔養物仁克仙蠹動而陛下不能絕奢侈遠聲色殺伐不止喜怒不除萬里有不歸之鬼市朝有流血之刑神丹大道

未可得成而臣疾與年偕今者虛瘵又不獲躬親齋戒
預覩彭祖丹砂之變於此邈矣先師安期先生昔所賜
金丹之方信而有徵若按節度奉法戒爾乃可備用之焉
若鬱砂虹飛玄朱九轉剖六二而流精奪日探霜雪而
月光風卷徘徊丹霞騰沸龍虎投鉛錫而黃金克成刀
圭入喉而凋氣立反爾乃駕神虬以上昇騁雲車以涉
遠當驗此方之神將明小臣之不妄矣乃以小丹方與
帝而稱疾固非大丹方也其夜武帝夢與少君俱上嵩

高上半道有繡衣使者乘龍持節從雲中下言太一請少君武帝覺即遣使者問少君消息且告近臣曰如朕夢少君將捨朕去矣明日少君臨病困武帝自往視并使左右人受其方書未竟而少君絕武帝流涕曰少君不死也故作此而去既斂之忽失其所在中表衣帶不解如蟬蛻也於是為殯其衣物百餘日行人有見少君在河東蒲坂市者乘青騾帝聞之使發其棺棺中無所復有釘亦不脫唯餘履在耳武帝殊益懊恨求少君之不

勤也明年栢梁臺火燒失諸祕書妙文也初少君與議
郎董仲相親見仲宿有固疾體枯氣少乃與其成藥二
劑并其方一篇用戊巳之草后土脂精良獸沉肪先莠
之根百卉華體龍銜之草亥月上旬合煎銅鼎童男童
女服盡一劑身體便輕服盡三劑齒落更生服盡五劑
命不復傾仲為人剛直博學五經然不達道術常笑人
服藥學道數上書諫武帝以為人生有命衰老有常非
道術所能延益雖見其有異以為天性非術所致得其

藥竟不服又不解從問其方為藏去之而已少君去後數月仲病甚矣又武帝數道其夢恨惜之仲乃憶所得少君藥試取服之未半能行身體輕壯所苦了愈藥盡氣力如三十時乃更信世間有不死之道即以去官行求道士問以方意悉不能曉然白髮皆還黑形容甚盛後八十餘乃死臨死謂子道生曰我得少君神方我不信事懷恨黃泉汝後可行求術人問解之者若長服此藥必度世也道生感父遺言遂不肯仕周旋天下求解

此方到江夏遇博澤先生先生曰此乃非神丹金玉也
可使人得數百年而已耳乃具為說解其方意所用物
真名道生合藥服之得壽三百七十歲入雞頭山中不
知竟得道不同時卓元成張子仁吳士耳蔡子盛魏仲
明張元遠服之或得三百歲或得五百歲皆至死不病
不偃面不皺理齒不落髮不白房屋不廢此蓋少君凡
弊方耳猶使人如此況其上方邪少君當去時密以六
甲左右竊飛術十二事傳東郭延以神丹飛玄之方授

少君鄉里人蒯子順者此二人後學道並得仙少君又授子訓崑崙神州貞形也

王真

王真字叔堅上黨人也少為羣吏年七十乃好道尋見仙經雜言說郊間人者周宣王時郊間採薪之人也採薪而行歌曰巾金巾入天門呼長精喻玄泉鳴天鼓養泥凡時人莫能知唯柱下史曰此是活國中人人其語秘矣其人乃古之漁父也何以知之八百歲人目瞳正方

千歲人目理縱採薪者乃千歲之人也貞讀此書而不解其旨遂搜問諸所在道士經年而遇有解其旨者語貞曰此近淺之術也為可駐年反白而已耳乃語訣云中金巾者恒存肺炁入泥丸中徐徐以繞身身常光澤喻玄泉者漱其口液而服之使人不老行之七日有效鳴天鼓者朝起常叩齒三十六下使身神安又夜恒存赤氣從天門入周身内外在腦中變為火以燔身身與火同光如此存之亦名曰鍊形泥丸腦也天門口也習

閉烝而吞之名曰胎息習漱舌下泉而嚥之名曰胎食行之勿休真受訣施行胎息胎食鍊形之方甚有驗斷穀二百餘年肉色光美徐行及馬力兼數人自歎曰我行此術唯可不死豈及神丹金玉之方邪乃師事蒯子訓子訓授其肘後方也魏武帝聞之呼與相見見侶年可三十許意嫌其虛詐定校其鄉里皆異口同辭多有少小見真者乃信其有道甚敬重之郊孟節師事真十數年真以蒸丹小餌法授孟節得度世鄉里計真已四

百歲後一日將三少妾登女几山語弟子言合丹去去
遂不復還真日行三百里孟節能合棗核以不食至十
年又能閉炁不息身不動搖若死人可至百日半歲亦
有家室此法是真所習郊間人之法也孟節為人質謹
不妄言魏武帝為立茅舍使令諸方士晉惠懷之際人
故有見孟節在長安市中者魏武帝時亦善招求方術
道士皆虛心待之但諸得道者莫肯告之以要言耳

陳長

陳長者在芻嶼山六百年每四時設祭亦不飲食亦無所修人有病者與祭水飲之皆愈也

劉綱

劉綱者上虞縣令也與妻樊夫人俱得道術二人俱坐林上綱作火燒屋從東邊起夫人作雨從西邊上火滅

樊夫人

樊夫人者劉綱之妻也綱字伯鸞仕為上虞令亦有道術能檄召鬼神禁制變化之道亦潛修密證人莫能知

為理尚清淨簡易而政令宣行民受其惠無旱暵漂墊
之害無疫毒驚暴之傷歲歲大豐遠近所仰暇日與夫
人較其術用俱坐堂上綱作火燒客碓舍從東而起夫
人禁之火即便滅庭中兩株桃夫妻各呪一株使之相
鬪擊良久綱所呪者不勝數走出於籬外綱唾盤中即
成鯽魚夫人唾盤中成獺食其魚綱與夫人入四明山
路值虎以面向地不敢仰視夫人以繩縛虎牽歸繫於
床脚下綱每共試術事事不勝將昇天縣廳側先有大

皂莢樹綱昇樹數丈力能飛舉夫人即平坐床上冉冉如雲炁之舉同昇天而去矣

東陵聖母

東陵聖母者廣陵海陵人也適杜氏師事劉綱學道能易形變化隱顯無方杜不信道常恚怒之聖母或行理疾救人或有所之詣杜恚之愈甚告官訟之云聖母姦妖不理家務官收聖母付獄頃之已從獄窓中飛去衆望見之轉高入雲中留所著履一緡在窓下自此昇天

遠近立廟祠之民所奉事禱祈立効常有一青鳥在祭
所人有失物者乞問所在青鳥即集盜物人之上路不
拾遺歲月稍久亦不復爾至今海陵海中不得為姦盜
之事大者即風波沒溺虎狼殺之小者即病傷也

孔元

孔元者常服松脂茯苓松實年更少壯已一百七十餘
歲人或飲酒請元作酒令元乃以杖拄地倒立頭向下
持酒倒飲人不能為之也乃於水邊鑿岸作一穴方丈

餘止其間斷穀或一月兩月而出後入西華嶽得道也

王烈

王烈字長休邯鄲人常服黃精并鍊鉛年二百三十八歲有少容登山如飛少為書生嵇叔夜與之游烈嘗入太行山聞山裂聲往視之山斷數百丈有青泥出如髓取搏之須臾成石如熟臘之狀食之味如粳米仙經云神仙五百歲輒一開其中有髓得服之者舉天地齊畢

涉正

涉正字玄真巴東人說秦王時事如目前常閉目行亦
不開弟子數十年莫見其開目者有一弟子固請開之
正乃為開目有聲如霹靂光如電弟子皆匐地李八百
呼為四百歲小兒也

焦先

焦先字孝然河東人也漢末關中亂先失家屬獨竄於
河渚間食草飲水無衣履時太陽長朱南望見之謂之
亡士欲遣船捕取同郡侯武陽語縣此狂癡人耳遂註

其籍給廩日五升人皆輕易之然其行不踐邪逕必循阡陌及其搶拾不取大穗飢不苟食寒不苟衣每出見婦人則隱翳須至乃出自作一瓜牛廬淨掃其中營木為床而草褥其上至天寒時搆火以自炙呻吟獨語太和青龍中嘗持一杖南渡河水泛漲輒獨云未可也由是人頗疑不狂所言多驗僉謂之隱者也年八十九終

孫登

孫登字公和汲郡人無家屬於郡北山為土穴居之好

讀易撫一絃琴性無恚怒人或投諸水中欲觀其怒登
既出便大笑嘗住宜陽山有作炭人見之知非常人與
語登不應文帝聞之使阮籍往觀既見與語亦不應嵇
康從之遊三年問其所圖終不答康將別謂曰先生竟
無言乎登乃曰子識火乎生而有光而不用其光果在
於用光人生而有才而不用其才果在於用才故用光
在乎得薪所以保其體用才在乎識貞所以全其生今
子才多識寡難乎免於今之世矣子無求乎康不能用

後作幽憤詩曰昔慚柳下今愧孫登竟莫知其所終

神仙傳卷六

欽定四庫全書

神仙傳卷七

晉 葛洪 撰

東郭延

東郭延字公游山陽人也少好道聞李少君有道求與
相見叩頭乞得執侍巾櫛灑掃之役少君許之見延小
心良謹可成臨當去密以五帝六甲左右靈飛之術遊
虛招真十二事授延告之曰此亦要道也審而行之亦
昇天矣口訣畢而遣去延遂還家合服靈飛散能夜書

在寢室中身生光點左右行六甲左右術能占吉凶天下當歿者識與不識皆逆知之又役使鬼神收攝虎豹無所不為在鄉里四百歲不老漢建安二十一年一但有數十人乘虎豹之來迎之鄰盡見之乃與親故別而辭去云詣崑崙臺臨去先以神丹方五帝靈飛祕要傳尹先生

靈壽光

靈壽光者扶風人也年七十時得朱英丸方合服之轉

更少壯如年二十時至建安元年已二百二十歲矣

劉京

劉京字太玄南陽人也漢孝文皇帝侍郎也後棄世從
邯鄲張君學道受餌朱英丸方合服之百三十歲視之
如三十許人後師事薊子訓子訓授京五帝靈飛六甲
十二事神仙十洲真形諸祕要京按訣行之甚効能役
使鬼神立起風雨召致行厨坐在立亡而知吉凶期日
又能為人祭天益命或得十年到期皆歿其不信者至

期亦歿周流名山五嶽與王真俱行悉遍也魏武帝時
故遊行諸弟子家皇甫隆聞其有道乃隨事之以雲母
九子丸及交接之道二方教隆隆按合行服之色理日
少髮不白齒不落年三百餘歲不知能得度世不耳魏
黃初三年京入衡山中去遂不復見京語皇甫隆曰治
身之要當朝朝服玉泉使人丁壯有顏色去三蟲而堅
齒也玉泉者口中液也朝來起早漱液滿口乃吞之琢
齒二七過如此者三乃止名曰鍊精使人長生也夫交

接之道至難非上士不能行之乘奔牛驚馬未足喻其
嶮墜矣狎性多淫得無當用此自戒乎如京言慮隆不
得度世也

嚴青

嚴青者會稽人也家貧常在山中燒炭忽遇仙人云汝
骨相合仙乃以一卷素書與之令以淨器盛之置高處
兼教青服石腦法青遂以淨器盛書置高處便聞左右
常有十數人侍之每載炭出此神便為引船他人但見

船自行後斷穀入小霍山去

帛和

帛和字仲理師董先生行炁斷穀朮又詣西城山師王君君謂曰大道之訣非可卒得吾暫往瀛洲汝於此石室中可熟視石壁久久當見文字見則讀之得道矣和乃視之一年了無所見二年似有文字三年了然見太清中經神丹方三皇文五嶽圖和誦之上口王君廻曰子得之矣乃作神丹服半劑延年無極以半劑作黃金

五十斤救惠貧病也

趙瞿

趙瞿者上黨人也病癩歷年衆治之不愈垂死或云不及活流棄之後子孫轉相注易其家乃賣糧將之送置山穴中瞿在穴中自怨不幸晝夜悲歎涕泣經月有仙人行經過穴見而哀之具問訊之瞿知其異人乃叩頭自陳乞哀於是仙人以一囊藥賜之教其服法瞿服之百許日瘡都愈顏色豐悅肌膚玉澤仙人又過視之瞿

謝受更生活之恩乞丐其方仙人告此是松脂耳此山中更多此物汝鍊服之可以長生不死瞿乃歸家家人初謂之鬼也甚驚愕瞿遂長服松脂身體轉輕氣力百倍登危越險終日不極年百七十歲齒不墮髮不白夜卧忽見臺間有光大如鏡者以問左右皆云不見久而漸大一室盡明如晝日又夜見面上有綵女二人長二三寸面體皆具但為小耳遊戲其口鼻之間如是且一年此女漸長大出在其側又常聞琴瑟之音欣然獨笑

在人間三百許年色如小童乃入抱犢山去必地仙也

宮嵩

宮嵩者大有文才著道書二百餘卷服雲母得地仙之道後入苧嶼山中仙去

容成公

容成公行玄素之道延壽無極

董仲君

董仲君者臨淮人也服炁鍊形二百餘歲不老曾被誣

繫獄乃佯死須臾蟲出獄吏乃舁出之忽失所在

倩平吉

倩平吉者沛人也漢初入山得道至光武時不老後託形尸假百餘年却還鄉里也

王仲都

王仲都者漢中人也漢元帝常以盛暑時暴之繞以十餘鑪火而不熱亦無汗凝冬之月令仲都單衣無寒色身上氣蒸如炊後不知所在

程偉妻

漢黃門郎程偉好黃白術娶妻得知方家女偉常從駕
出而無時衣甚憂妻曰請致兩段縑縑即無故而至前
偉按枕中鴻寶作金不成妻乃往視偉偉方扇炭燒笊
笊中有水銀妻曰吾欲試相視一事乃出其囊中藥少
許投之食頃發之已成銀偉大驚曰道在汝處而不早
告我何也妻曰得之須由命者於是偉日夜說誘之賣
田宅以供美食衣服猶不肯告偉偉乃與伴謀撾笞杖

之妻輒知之告偉言道必當傳其人得其人得路相遇
輒教之如非其人口是而心非雖寸斷而支解而道猶
不出也偉逼之不止妻乃發狂裸而走以泥自塗遂卒

薊子訓

薊達字子訓齊國臨淄人李少君之邑人也少仕州郡
舉孝廉除郎中又從軍拜駙馬都尉晚悟治世俗綜理
官無益於年命也乃從少君學治病作醫法漸久見少
君有不死之道遂以弟子之禮事少君而師焉少君亦

以子訓用心專知可成就漸漸告之以道家事因教令
胎息胎食住年止白之法行之二百餘年顏色不老在
鄉里與人信讓從事性好清淨常閒居讀易時作小小
文疏皆有意義少君晚又授子訓無常子大幻化之術
按事施行皆効曾見比舍家抱一兒從求抱之失手而
墮地即死其家素尊敬之不敢有悲哀之色而埋之謂
此兒命應不成人行已積日轉不能復思之子訓因還
外抱兒還家家人恐是鬼乞不復用子訓曰但取無苦

故是汝兒也兒識其母喜笑欲往母乃取之意猶不了
子訓既去夫婦共往掘視所埋死兒窆器中有泥兒長
六寸許耳此兒遂長大又諸老人髮必白者子訓但與
之對坐共語宿昔之間則明旦皆髮黑矣亦無所施為
為黑可期一年二百日也亦復有不使人髮黑者蓋神
幻之大變者也京師貴人聞之莫不虛心欲見子訓而
無緣致之子訓比居有年少為太學生於是諸貴人共
呼語之卿所以勤苦讀書者欲以課試規富貴耳但為

吾一致薊子訓來能使卿不勞而達書生許諾乃歸親
事子訓朝夕灑掃立侍左右如此且二百日子訓語書
生曰卿非學道者何能如此書生曰忝鄉里末流長幼
之道自當爾子訓曰何以不道實而作虛飾邪吾以具
知卿意諸貴人欲得見我我亦何惜一行之勞而不使
卿得榮位乎便可還語諸人吾某月某日當往書生甚
喜到京師具向諸貴人說此意到期日子訓未行書生
父母憂之往視子訓子訓曰恐我不行也不使卿兒失

信當發以食時去所居書生父母相謂曰薊先生雖不
如期至要是往也定後日書生歸推計之子訓以其日
中時到京師是不能半日行千餘里既至書生往見之
子訓子訓問書生曰誰欲見我者書生曰欲見先生者
甚多不敢枉屈但乞知先生所止自當來也子訓曰不
須使來吾尚千餘里來寧復與諸人計此邪鄉今日使
人人盡語之使各絕賓客吾日中當往臨時自當擇所
先詣書生如其言語貴人貴人各灑掃到日中子訓往

凡二十三處便有二十三子訓各在一處諸貴人各各喜自謂子訓先詣之定明日相參問同時各有一子訓其衣服顏色皆如一而論說隨主人諮問各各答對不同耳主人竝為設酒食之具以餉子訓皆家家盡禮飲食之於是遠近大驚諸貴人竝欲詣之子訓謂書生曰諸人謂我當有重瞳八采故欲見我我亦無所道我不復往便爾去矣適出門諸貴人冠蓋塞道到門書生言適去東陌上乘青騾者是也於是各各走馬逐之望

見其驟徐徐而行各走馬逐之不及如此行半日而常相去一里許不可及也乃各罷還子訓既少君鄉里弟子微密謹慎思證道與隨時明匠將足甄綜衆妙矣

神仙傳卷七

欽定四庫全書

神仙傳卷八

晉 葛洪 撰

葛玄

葛玄字孝先丹陽人也生而秀穎性識英明經傳子史無不該覽年十餘俱失怙恃忽歎曰天下有常不死之道何不學焉因遁跡名山參訪異人服餌芝朮從仙人左慈受九丹金液仙經玄勤奉齋科感老君與太極真人降於天台山授玄靈寶等經三十六卷久之太上又

與三真人項負圓光乘八景玉輿寶蓋幡幢旌節煥耀
空中從官千萬命侍經仙郎王思真披九光玉韞出洞
元大洞等經三十六卷及上清齋二法一絕羣獨宴靜
炁遺形冥心之齋也二清壇肅侶依太真之儀先拔九
祖次及家門後謝已身也靈寶齋六法一金錄調和陰
陽寶鎮國祚二玉錄保佑后妃公侯貴族三黃錄鄉相
牧伯拔度九祖罪原四明真超度祖先解諸冤對五三
元自謝犯戒之罪六八節謝七祖及已身請福謝罪也

及洞神太一塗炭等齋并戒法等件悉遵太上之命修煉勤苦不怠尤長於治病收効鬼魅之術能分形變化吳大帝要與相見欲加榮位玄不枉求去不得待以客禮一日語弟子張恭言吾為世主所逼留不遑作大藥今當以八月十三日中時去矣至期玄衣冠入室臥而氣絕顏色不變弟子燒香守之三日三夜夜半忽大風起發屋折木聲響如雷燭滅良久風止燃燭失玄所在但見委衣床上帶無解者明旦問隣人隣人言了無大

風風止在一宅內籬落樹木並敗折也

左慈

左慈者字元放廬江人也少明五經兼通星緯見漢祚將盡天下亂起乃嘆曰值此衰運官高者危財多者死當世榮華不足貪也乃學道術尤明六甲能役使鬼神坐致行厨精思於天柱山中得石室內九丹金液經能變化萬端不可勝紀曹公聞而召之閉一室中使人守視斷其穀食日與二升水暮年乃出之顏色如故曹公

曰吾自謂天下無不食之人曹公乃欲從學道慈曰學道當得清淨無為非尊貴所宜曹公怒乃謀殺之慈已知之求乞骸骨曹公曰何忽去耳慈曰公欲殺慈慈故求去耳曹公曰無有此意君欲高尚其志者亦不久留也乃為設酒慈曰今當遠適願乞分杯飲酒公曰善是時天寒溫酒尚未熱慈解劍以攪酒須臾劍都盡如人磨墨狀初曹公聞慈求分杯飲酒謂慈當使公先飲以餘與慈耳而慈拔簪以畫杯酒酒即中斷分為兩向慈

即飲其半送半與公公不喜之未即為飲慈乞自飲之
飲畢以杯擲屋棟杯懸着棟動搖似飛鳥之俯仰若欲
落而不落一座莫不矚目視杯既而已失慈矣尋問之
慈已還所住處曹公遂益欲殺慈乃勅內外收捕慈慈
走羣羊中追者視慈入羣羊中而奄忽失之疑其化為
羊也然不能分別之捕吏乃語羊曰人主意欲得見先
生暫還無苦於是羣羊中有一大者跪而言吏乃相謂
曰此跪羊是慈也復欲擒之羊無大小悉長跪追者亦

不知慈所在乃止後有知慈處者以告曹公公遣吏收
之得慈慈非不得隱故欲令人知其神化耳於是受執
入獄獄吏欲考訊之戶中有一慈戶外亦有一慈不知
孰是曹公聞而愈惡之使引出市殺之須更有七慈相
似官收得六慈失一慈有頃六慈皆失尋又見慈走入
市乃閉市四門而索之或不識者問慈形貌何似傳言
慈眇一目青葛巾單衣見有似此人者便收之及爾一
市中人皆眇一目葛巾單衣竟不能分曹公令所在普

逐之如見便殺後有人見慈便斷其頭以獻曹公公大喜及至視之乃一束茅耳有從荊州來者見慈在荊州荊州牧劉表以為惑衆復欲殺慈慈意已知表出耀兵乃欲見其道術乃徐去詣表說有薄禮願以餉軍表曰道人單僞吾軍人衆非道人所能餉也慈重道之表使人取之有酒一器脯一束而十餘人共舁之不起慈乃自取之以一刀削脯投地請百人運酒及脯以賜兵士人各酒三杯脯一片食之如常酒脯味凡萬餘人皆周

足而罷中酒如故脯亦不減座中又有賓客數十人皆
得大醉表乃大驚無復害慈之意慈數日委表東去入
吳吳有徐隨者亦有道術居丹徒慈過隨門門下有客
車六七乘客詐慈云徐公不在慈便即去宿客見其牛
皆在楊柳樹杪行適上樹即不見下即復見牛行樹上
又車轂中皆生荊棘長一尺斫之不斷搖之不動宿客
大懼入報徐公說有一眇目老公至門吾欺之言公不
在此人去後須臾使車牛皆如此不知何意徐公口咄

咄此是左公過我汝曹那得欺之急追之諸客分布逐之及慈羅列叩頭謝之慈意解即遣還去及至見車牛如故繫在車轂中無復荆木也慈見吳先主孫權權素知慈有道頗禮重之權侍臣謝送知曹公劉表皆忌慈惑衆復譖於權欲使殺之後出遊請慈俱行令慈行於馬前欲自後刺殺之慈著木屐持青竹杖徐徐緩步行常在馬前百步著鞭策馬操兵器逐之終不能及送知其有道乃止慈告葛仙公言當入霍山中合九轉丹丹

成遂仙去矣

王遙

王遙者字伯遼鄱陽人也有妻無子頗能治病病無不愈者亦不祭祀不用符水針藥其行治病但以八尺布帋敷坐於地不飲不食須臾病愈便起去其有邪魅作禍者遙畫地作獄因招呼之皆見其形物入在獄中或狐狸鼯蛇之類乃斬而燔燒之病者即愈遙有竹篋長數寸有一弟子姓錢隨遙數十年未嘗見遙開之常一

夜大雨晦暝遙使錢以九節杖擔此篋將錢出冒雨而行遙及弟子衣皆不濕又常有兩炬火導前約行三十里許登小山入石室室中先有二人遙既至取弟子所擔篋發之中有五舌竹簧三枚遙自鼓一枚以二枚與室中二人並坐鼓之良久遙辭去三簧皆內篋中使錢擔之室中二人出送語遙曰卿當早來何為久在俗間遙答曰我如是當來也遙還家百日天復雨遙夜忽大治裝遙先有葛單衣及葛布巾已五十餘年未嘗著此

夜皆取著之其妻即問曰欲捨我去乎遙曰暫行耳妻
曰當將錢去否遙曰獨去耳妻即泣涕因自擔簏而去
遂不復還後三十餘年弟子見遙在馬蹄山中顏色更
少蓋地仙也

陳永伯

陳永伯者南陽人也得淮南王七里散方試按合服之
二十一日忽然不知所在永伯有兄子名增族年十七
亦服之其父繫其足閉於密戶中晝夜使人守視之二

十八日亦不復見不知所之本方云服之三十日得仙而陳氏二子服之未二十日而失所在後人不敢服仙去必有仙官來迎但人不見之耳

太山老父

太山老父者莫知其姓名漢武帝東巡狩見老父鋤於道間頭上白光高數尺怪而呼問之老父狀如年五十許人而面有童子之色肌體光華不與俗人同帝問有何道術耶老父答曰臣年八十五時衰老垂死頭白齒

落有道士教臣絕穀服朮飲水并作神枕枕中有三十
二物其二十四物以象二十四氣其八物以應八風臣
行之轉老為少黑髮更生齒墮復出日行三百里臣今
年百八十矣武帝愛其方賜之金帛老父後入岱山中
去十年五年時還鄉里三百餘年乃不復還也

巫炎

巫炎者字子都北海人也漢武帝出見子都於渭橋其
頭上鬱鬱有紫氣高丈餘帝召而問之君年幾何所得

何術而有異氣乎子都答曰臣年今已百三十八歲亦無所得將行帝召東方朔使相此君有何道術朔對曰此君有陰術武帝屏左右而問之子都對曰臣昔年六十五時苦腰脊疼痛脚冷不能自溫口中乾苦舌燥涕出百節四肢各各疼痛又足痺不能久立得此道已來已七十三年有子三十六人身體強健無所病患氣力乃如壯時無所憂患帝曰卿不仁有道而不聞於朕非忠臣也子都頓首曰臣誠知此道為真然陰陽之事公

中之私臣子之所難言也又行之皆逆人情能為之者少故不敢以聞帝曰勿謝虧君耳遂受其法子都年二百餘歲服餌水銀白日昇天武帝後頗行其法不能盡用之然得壽最勝於他帝遠矣

河上公

河上公者莫知其姓名也漢孝文帝時結草為庵于河之濱常讀老子道德經時文帝好老子之道詔命諸王公大臣州牧在朝卿士皆令誦之不通老子經者不得

陞朝帝於經中有疑義人莫能通侍郎裴楷奏云陝州河上有人誦老子即遣詔使賫所疑義問之公曰道尊德貴非可遙問也帝即駕幸詣之公在庵中不出帝使人謂之曰溥天之下莫非王土率土之濱莫非王域中四大而王居其一子雖有道猶朕民也不能自屈何乃高乎朕能使民富貴貧賤須臾公即拊掌坐躍冉冉在空虛之中去地百餘尺而止於虛空良久俛而答曰余上不至天中不累人下不居地何民之有焉君宜能

令余富貴貧賤乎帝大驚悟知是神人方下輦稽首禮
謝曰朕以不能忝承先業才小任大憂於不堪而志奉
道德直以暗昧多所不了惟願道君垂愍有以教之河
上公即授素書老子道德章句二卷謂帝曰熟研究之
所疑自解余著此經以來千七百餘年凡傳三人連子
四矣勿示非人帝即拜跪受經言畢失公所在遂於西
山築臺望之不復見矣論者以為文帝雖眈尚大道而
心未純信故示神變以悟帝意欲成其道時人因號河

上公

劉根

劉根字君安長安人也少時明五經以漢孝成皇帝綏和二年舉孝廉除郎中後棄世道遁入嵩高山石室中崢嶸峻絕高五千丈自崖北而入冬夏無衣毛長一二尺其顏如十四五許人深目多鬚鬢皆黃長三四寸每與坐或時忽然變著高冠玄衣人不覺換之時衡府君在潁川自說其先祖有與根同歲者王莽數使使請根

根不肯往衡府君道廟掾王珍問起居根不答再令功曹趙公往山達敬根惟言謝府君更無他言後潁川太守高府君到官民人大疫郡中死者過半太守家大小悉病府君使珍從根求消災除疫氣之術珍叩頭述府君意根教於太歲宮氣上穿地作孔深三尺以沙著中以酒沃之君依言病者即愈疫氣登絕後常用之有効後太守史祈以根為妖妄欲殺之遣使呼根舉郡皆諫以為不可祈殊不肯止諸吏先使人以此意報根使者

至根曰太守欲吾來何也吾當往耳不往者恐汝諸人必得罪謂卿等不來呼我也根即詣郡時賓客盈坐祈令根前使庭下五十餘人將繩索鞭杖立于根後祈厲聲問曰君有道耶根曰有道祈曰有道能召鬼使我見乎若不見即當戮汝根曰甚易耳遂偕祈前筆硯書作符扣堦鋒錚然作銅聲因長嘯嘯音非常清亮聞于城外聞者莫不肅然衆賓客悉恐須臾廳前南壁忽開數丈見四赤衣吏傳呼避道赤衣兵數十人操持刀劒將

一科車直從壞壁中入到廳前根勅下車上鬼赤衣兵發車上烏被上有一老公一老姥反縛囚繫大繩的頭熟視之乃祈亡父母也祈驚愕愴然流涕父母亦泣責罵祈我生時汝仕宦未達不得汝祿養我死後汝何為犯忤神仙尊官使我被收束囚辱如此汝亦何面目立於人間祈下階叩頭向根乞放赦先人根乃勅赤衣兵將囚出去廳前南壁復開車過尋失車所在根亦隱去祈恍惚若狂其妻暴卒良久乃蘇云見君家先被捉者

大怒云何以犯觸大仙使我被罪當來殺汝後月餘祈及妻兒並卒少室廟掾王珍數得見根顏色懽悅之情伏地叩頭請問根從初得道之由根說昔入山精思無處不到後入華陰山見一人乘白鹿從千餘人玉女左右四人執彩旄之節年皆十五六余再拜頓首求乞一言神人乃住告余曰汝聞昔有韓衆否乎答曰嘗聞有之神人曰即我是也余自陳少好長生不死之道而不遇明師頗習方書按而為之多不驗豈根命相不應度

世也今日有幸逢大神是根宿夜夢想從心所願願見
哀憐賜其要訣神未肯告余余乃流涕自搏重請神人
曰坐吾將告汝汝有仙骨故得見我汝今髓不滿血不
煖氣少腦減筋急肉沮故服藥行氣不得其力必欲長
生且先治病十二年乃可服仙之上藥耳夫仙道有昇
天躡雲者有遊行五嶽者有食穀不死者有尸解而仙
者要在於服藥服藥有上下故仙有數品也不知房中
之事行氣導引而不得神藥亦不能仙也藥之上者唯

有九轉還丹及太乙金液服之皆立便登天不積日月
矣其次雲母雄黃之屬能使人乘雲駕龍亦可使役鬼
神變化長生者草木之藥唯能治病補虛駐年返白斷
穀益氣不能使人不死也高可數百年下纔全其所稟
而已不足久賴矣余乃頓首曰今日受教乃天也神人
曰必欲長生先去三尸三尸去則意志定嗜欲除也乃
以神方五篇見授云伏尸常以月望晦朔上天白人罪
過司命奪人算紀使少壽人身中神欲人生而三尸欲

人死死則神散返於無形之中而三尸成鬼而人享奠
祭祀之則得歆饗以此利在人速死也夢與惡人鬪爭
此乃神與尸相戰也根乃從次合作服之遂以得仙珍
又言數見投符於地有所告召即見如取之者然不見
人又佳聞有所推問有人答對而不見形也或聞有鞭
杖聲而或地上見血莫測其端也教珍守一行氣存神
先生三綱六紀謝過上古之法不知珍能得仙名耳根
後入鷄頭山中仙去矣

神仙傳卷八

欽定四庫全書

神仙傳卷九

晉 葛洪 撰

壺公

壺公者不知其姓名今世所有召軍符召鬼神治病王府符凡二十餘卷皆出於壺公故摠名為壺公符汝南費長房為市掾時忽見公從遠方來入市賣藥人莫識之其賣藥口不二價治百病皆愈語賣藥者曰服此藥必吐出某物某日當愈皆如其言得錢日收數萬而隨

施與市道貧乏飢凍者所留者甚少常懸一空壺於坐上日入之後公輒轉足跳入壺中人莫知所在唯長房於樓上見之知其非常人也長房乃日日自掃除公座前地及供饌物公受而不謝如此積久長房不懈亦不敢有所求公知長房篤信語長房曰至暮無人時更來長房如其言而往公語長房曰卿見我跳入壺中時卿便隨我跳自當得入長房承公言為試展足不覺已入既入之後不復見壺但見樓觀五色重門閣道見公左右

侍者數十人公語長房曰我仙人也忝天曹職所統供
事不勤以此見謫暫還人間耳卿可教故得見我長房
不坐頓首自陳肉人無知積劫厚幸謬見哀愍猶如剖
棺布氣生枯起朽但見臭穢頑弊不任驅使若見憐念
百生之厚幸也公曰審爾大佳勿語人也公後詣長房
於樓上曰我有少酒汝相共飲之酒在樓下長房遣人
取之不能舉益至數十人莫能得上長房白公公乃自
下以一指提上與長房共飲之酒器不過如蟬大飲之

至旦不盡公告長房曰我某日當去卿能去否長房曰
思去之心不可復言惟欲令親屬不覺不知當作何計
公曰易耳乃取一青竹杖與長房戒之曰卿以竹歸家
使稱病後日即以此竹杖置卧處嘿然便來長房如公
所言而家人見此竹是長房死了哭泣殯之長房隨公
去恍惚不知何所之公獨留之於羣虎中虎磨牙張口
欲噬長房長房不懼明日又內長房石室中頭上有大
石方數丈茅繩懸之諸蛇並往嚙繩欲斷而長房自若

公往撰之曰子可教矣乃命噉溷臭惡非常中有蟲長寸許長房色難之公乃嘆謝遣之曰子不得仙也今以子為地上主者可壽數百餘歲為傳封符一卷付之曰帶此可舉諸鬼神嘗稱使者可以治病消災長房憂不能到家公以竹杖與之曰但騎此到家耳長房辭去騎杖忽然如睡已到家家人謂之鬼具述前事乃發視棺中惟一竹杖乃信之長房以所騎竹杖投葛陂中視之乃青龍耳長房自謂去家一日推之已一年矣長房

乃行符收鬼治病無不愈者每與人同坐共語而目瞋
訶遣人問其故曰怒鬼魅之犯法耳汝南郡中常有鬼
怪歲輒數來來時導從威儀如太守入府打鼓周行內
外匝乃還去甚以為患後長房詣府君而正值此鬼來
到府門前府君馳入獨留長房鬼知不敢前欲去長
房厲聲呼使捉前來鬼乃下車把版伏庭中叩頭乞得
自改長房呵曰汝死老鬼不念溫涼無故導從唐突官
府君知當死否急復令還就人形以一札符付之令送

與葛陂君鬼叩頭流涕持札去使以追視之以札立陂
邊以頸繞札而死東海君來旱長房後到東海見其民
請雨謂之曰東海君有罪吾前繫於葛陂今當赦之令
其作雨於是即有大雨長房曾與人共行見一書生黃
巾被裘無鞍騎馬下而叩頭長房曰促還他馬赦汝罪
人問之長房曰此狸耳盜社公馬也又嘗與客坐使至
市市鮮頃刻而還或一日之間人見在千里之外者數
處

尹軌

尹軌者字公度太原人也博學五經尤明天文理氣河洛讖緯無不精微晚乃奉道常服黃精日三合年數百歲而顏色美少常聞其遠祖尹喜以周康王昭王之時居草樓遇老君與說經其後周穆王再修樓觀以待有道之士公度遂居樓觀焉自云喜數來與相見授以道要由是能坐在立亡變化之事蘇并州家先祖頻奉事之累世子孫見之顏狀常如五十歲人遊行人間或入

山一年半年復見無妻息其說天下盛衰治亂之期安危吉凶所在未嘗不効晉永康元年十二月道洛陽城西一家求寄宿主人以祭蜡不欲令宿良久公度語其姓名主人乃開門迎公度與前設酒食又以數斛穀與公度所乘青騾公度竟不飲啖騾亦不食穀明旦去謂主人曰君是不急難人耳先雖不欲受我宿後更有勤意吾及騾雖不食君所設意望相酬耳今賜君神藥一丸帶以隨身明年當有兵死者滿地此藥可以全君體

命明年洛中果有趙王倫之亂死者數萬舉家有從軍者皆不還在家又為刼殺皆盡惟餘得藥一人耳公度腰中帶漆竹管數十枚中皆有藥入口即活天下大疫有得藥如棗者塗其門則一家不病病者立愈又弟子黃理居陸渾山中患虎為暴公度使斷大木為柱去家四方各一里外埋一柱公度即以印印之虎即絕跡又有怪鳥止其屋上以語公度公度為書一奏符著鳥鳴處至夕鳥伏死符下遂絕有人遭大喪當年而貧窮不

及公度見而嗟之孝子說其孤苦公度愴然曰君能得數斤鉛否孝子曰可得耳乃具鉛數十斤公度將入山中小屋下鑪火中銷鉛以神藥如棗大投沸鉛中攪之皆成銀以與之曰吾念汝貧困不能營葬故以相與慎勿言也復又有一人本土族子弟遇公事簿書不明當陪負官錢百萬出賣田宅車牛不售而見收繫公度語所識富人曰可暫以百萬錢借我欲以救之後二十日頓相還也富人即以錢百萬與公度公度以與遭事者

乃語曰君致錫百兩其人即買錫與之公度於鑪中洋錫以神藥一方寸匕投沸錫中變成黃金金即秤賣得錢百萬還錢主公度後到南陽太和山昇仙去矣

介象

介象者字元則會稽人也學通五經博覽百家之言能屬文陰修道法入東嶽受氣禁之術能茅上燃火煮雞雞熟而茅不焦能令一里內不炊不蒸雞犬三日不鳴不吠能令一市人皆坐不能起能隱形變化為草木鳥

獸聞九丹之經周遊數千里求之不值明師乃入山精
思冀遇神仙疲極卧石上有一虎往舐象象睡寤見虎
乃謂之曰天使汝來侍衛我者汝且停若山神使汝來
試我汝疾去虎乃去象入山見谷中有石子紫色光彩
大如雞子不可稱數乃取兩枚而遊谷深不得度乃還
於山中見一美女年十五六許顏色非常衣服五彩蓋
仙人也象叩頭乞長生之方女曰汝急送手中物還故
處乃來吾故於此待汝象即以石送於谷中而還見女

子在舊處象復叩頭女曰汝血養之氣未盡斷穀三年
更來吾止此象歸斷穀三年乃復往見此女故在前處
乃以丹方一日授象告曰得此便仙勿他為也象未得
合作此藥常住弟子駱延雅合惟下平牀中有書生數
人共論書傳事云云不判象傍聞之不能忍乃為決解
之書生知象非凡人密表奏象於其主象知之欲去曰
恐官事拘束我耳延雅固留吳王詔徵象到武昌甚敬
重之稱為介君為象起第宅以御帳給之賜遺前後累

千金從象學隱形之術試還後宮及出入殿門莫有見者又令象變化種瓜菜百菓皆立生與先主共論鱸魚何者最上象曰鯢魚為上先主曰此魚乃在海中安可得乎象曰可得耳但令人於殿中庭方堦者水滿之象即索釣餌起釣之垂綸於堦中不食頃得鯢魚先主驚喜問象曰可食否象曰故為陛下取作鱠安不可食仍使厨人切之先主問曰蜀使不來得薑作鱠至美此間薑不及也何由得乎象曰易得耳願差一人并以錢五

千文付之象書一符以著竹杖中令其人閉目騎杖杖止便買薑買薑畢復閉目此人如言騎杖須臾已到成都不知何處問人言是蜀中也乃買薑于時吳使張溫在蜀從人恰與買薑人相見於是甚驚作書寄家此人在買薑還厨中繪始就矣象又能讀諸符文如讀書無誤謬者或不信之取諸雜符除其標注以示象象皆一一別之又有一人種黍於山中嘗患獼猴食之聞象有道從乞辟猴法象告無他汝明日往看黍若見猴羣下大

嗶語之曰吾已告介君介君教汝莫食黍此人倉卒直言象欺弄之明日往見羣猴欲下樹試告象言語猴即各還樹絕跡矣象在吳連求去先主不許象言某月日病先主使左右以梨一奩賜象象食之須臾便死先主殯埋之以日中死其日舖時已至建鄴以所賜梨付苑內種之吏後以表聞先主發視其棺中唯一奏版符耳先主思象使以所住屋為廟時時躬往祭之常有白鵠來集座上良久乃去後弟子見象在葢竹山中顏色更

少焉

神仙傳卷九

欽定四庫全書

神仙傳卷十

晉 葛洪 撰

董奉

董奉者字君異侯官縣人也昔吳先主時有年少作本縣長見君異年三十餘不知有道也罷去五十餘年後復為他職行經侯官諸故吏人皆往見故長君異亦往顏色如昔了不異故長宿識之問曰君無有道也昔在縣時年紀如君輩今吾已皓白而君猶少也君異曰偶爾

耳杜燮為交州刺史得毒病死已三日君異時在南方乃往以三九藥內死人口中令人舉死人頭搖而消之食頃燮開目動手足顏色漸還半日中能起坐遂活後四日乃能語云死時奄然如夢見有數十烏衣人來收之將載露車上去入大赤門徑以寸獄獄各一户户纔容一人以燮內一戶中乃以土從外封之不復見外恍惚間聞有一人言太乙遣使者來召杜燮急開出之聞人以鉞掘其所居戶良久引出之見外有車馬赤蓋三

人共坐車上一人持節呼燮上車將還至門而覺燮既活乃為君異起高樓於中庭君異不飲食唯啖脯棗多少飲酒一日三為君異設之君異輒來就燮處飲食下樓時忽如飛鳥便來到座不覺其下上樓亦爾如此一年從燮求去燮涕泣留之不許燮問曰君欲何所之當具大船也君異曰不用船宜得一棺器耳燮即為具之至明日日中時君異死燮使人殯埋之七日人有從容昌來見君異因謝杜侯好自愛重燮乃開視君異棺中

但見一帛一面畫作人形一面丹書符君異後還廬山下居有一人少使病癰垂死自載詣君異叩頭乞哀君異使此人坐一戶中以五重布巾韜病者目使勿動搖乃勅家人莫近病人云聞有一物來舐之痛不可堪無處不匝度此物舌當一尺許其氣息大小如牛竟不知是何物良久乃去君異乃往解病人之巾以水與飲遣去不久當愈且勿當風十數日間病者身體通赤無皮甚痛得水浴即不復痛二十餘日即皮生瘡愈身如凝

脂後常大旱百穀焦枯縣令丁士彥謂綱紀曰董君有道必能致雨乃自贗酒脯見君異說大旱之意君異曰雨易得耳因仰視其屋曰貧家屋皆見天不可以得雨如何縣令解其意因曰先生但為祈雨當為架好屋於是明日士彥自將吏人乃運竹為起屋屋成當泥塗作人掘土取壤欲取水作泥君異曰不煩運水日暮自當雨也其夜大雨高下皆足又君異居山間為人治病不取錢物使人重病愈者使栽杏五株輕者一株如此數

年計得十萬餘株鬱然成林而山中百蟲羣獸遊戲杏下竟不生草有如耘治也於是杏子大熟君異於杏林下作簞倉語時人曰欲買杏者不須來報徑自取之得將穀一器置倉中即自往取一器杏云每有一穀少而取杏多者即有三四頭虎噬逐之此人怖懼而走杏即傾覆虎乃還去到家量杏一如穀少又有人空往偷杏虎逐之到其家乃嚙之至死家人知是偷杏遂送杏還叩頭謝過死者即活自是已後買杏者皆於林中自平

量之不敢有欺者君異以其所得糧穀賑救貧窮供給
行旅歲消三千斛尚餘甚多縣令親故家有女為精邪
所魅百不能治以語君異若能得女愈當以侍巾櫛君
異即為君勅諸魅有大白鼉長丈六尺陸行詣病者問
君異使人斬之女病即愈遂以女妻之久無兒息君異
每出行妻不能獨住乃乞一女養之女年十歲君異一
旦竦身入雲中去婦及養女猶守其宅賣杏取給有欺
之者虎逐之如故養女長大納婿同居其婿凶徒也常

取諸祠廟之神衣物廟下神下巫語云某甲恃是仙人女婿奪吾衣物吾不在此但羞人耳當為仙人故無用為問君異在民間僅百年乃昇天其顏色常如年三十時人也

李根

李根字子源許昌人也有趙賈者聞其父祖言傳世見根也賈為兒時便隨事根至賈年八十四而根年少不老昔在壽春吳太文家太文從之學道得作金銀法立

成根能變化入水火中坐致行厨能供二十人皆精細之饌四方奇異之物非當地所有也忽告太丈云王陵當敗壽春當陷兵中不復居可急徙去衆乃使人收根欲殺之根時乃方欲書疏奄聞外有千餘人圍其家求根語太丈父曰忽忽但語吾不知官自來搜之昨已去矣太丈出戶還顧窺根失所在左右書器物皆不復見於是官兵入索困食衣篋之中無處不遍不得根及良久太丈出見根固在向坐儼然如故根語太丈曰王太

尉當族誅卿弟泄語十日中當卒死皆果如言弟子家有以女給根者此女知書根出行竊視根素書一卷讀之得根自說其學道經疏云以漢元封中學道於某甲時年計根已七百餘年也又太丈說根兩目瞳子皆方按仙經說八百歲人瞳子方也根告諸弟子言我不得神丹大道之訣唯得地仙方耳壽畢天地然不為下土之士也

李意期

李意期者蜀郡人也傳世識之云是漢文帝時人也無妻息人有欲遠行速至者意期以符與之并以丹書其人兩足則千里皆不盡日而還人有說四方郡國宮觀市井者座中或未見重問說者意期即為撮土作之作郡國形象皆是但盈寸耳須臾消滅或遊行不知所之一年許復還於蜀中乞食得以與貧乏者於成都角中作一土窟而居其中冬夏單衣髮長剪去之但使長五寸許啜少酒脯及棗果或食百日不出窟則無所

食也劉玄德欲東伐吳報關羽之怨使人迎意期意期到玄德敬禮之問其伐吳意期不答而求紙筆玄德與之意期畫作兵馬器仗十數紙便一一以手裂壞之曰咄咄又畫一大人掘地埋之乃徑還去玄德不悅而出軍果大敗十餘萬衆纔數百人得還器仗軍資一時蕩盡玄德忿恥發病而卒於永安宮乃追念其所作大人而埋之正是玄德之死象也意期少言語人有所問略不對答蜀人有憂患往問吉凶自有常候但占意期顏

色若懽悅則百事吉慘戚則百事惡鄧艾未到蜀百餘日忽失意期所在後入瑯琊山中不復出也

王興

王興者陽城人也常居一谷中本凡民不知書無學道意也昔漢武帝元封二年上嵩山登大愚石室起道宮使董奉君東方朔等齋潔思神至夜忽見仙人長二丈餘耳下垂至肩武帝禮而問之仙人曰吾九疑仙人也聞中獄有石上菖蒲一寸九節服之可以長生故來採

之言訖忽然不見武帝顧謂侍臣曰彼非欲學道服食者必是中嶽之神以此教朕耳乃採菖蒲服之且二年而武帝性好熱食服菖蒲每熱者輒煩悶不快乃止時從官多皆服之然莫能持久唯王興聞仙人使武帝常服菖蒲乃採服之不息遂得長生魏武帝時猶在其隣里老小皆云傳世見之視興常如五十許人其強健日行三百里後不知所之

黃敬

黃敬字伯嚴武陵人也少讀誦經書仕州為部從事後
棄世學道於霍山八十餘年復入中嶽專行服氣斷穀
為吞吐之事胎息內視召六甲玉女吞陰陽符又思赤
星在洞房前轉大如火周身至二百歲轉還少壯道士
王紫陽數往見從求要言敬告紫陽曰吾不修服藥之
道但守自然蓋地仙耳何足詰問新野陰君神丹昇
天之法此真大道之極也子可從之人能除遣嗜慾如
我者不可以學我所為也紫陽固請不止敬告紫陽曰

大關之中有輔星想而見之翕習成赤童在焉持朱庭指而搖之鍊身形消遣三尸除死名審能守之可長生失之不久倫竊真紫陽受之得長生之道也

魯女生

魯女生者長樂人也服胡麻餌朮絕穀八十餘年甚少壯一日行三百餘里走逐麋鹿鄉里傳世見之二百餘年入華山中去時故人與女生別後五十年入華山廟逢女生乘白鹿從後有玉女數十人也


甘始

甘始者太原人也善行氣不飲食又服天門冬行房中之事依容成玄素之法更演益之為一卷用之甚有近効治病不用針灸湯藥在人間三百餘歲乃入王屋山仙去也

封君達

封君達者隴西人也服黃精五十餘年又入烏鼠山服鍊水銀百餘歲往來鄉里視之年如三十許人常騎青

牛聞人有疾病時死者便過與藥治之應手皆愈不以
姓字語人世入識其乘青牛故號為青牛道士後二百
餘年入玄丘山仙去也



神仙傳卷十